



INTRODUCZIUN

DA SORA ARMINA MAISSEN

Vul Jesus dir cun quei, ch'ins astgi buca carezar ils geniturs, ni ils geniturs buca il feagl ni la feglia? – Na, tuttavia buc! La carezia ei «il» condament ch'el ha dau a nus avon che bandunar quest mund, ed il qual cumpeglia tut ils auters condaments. Mo Jesus tschenta prioritats. El vul che nus sedecidien independentamein e libramein per el. Nus s'udin mo in cuort mument a nos geniturs. «Il Segner» ha «dau» a nus la veta ed el ha dau «per» nus la veta. Nus s'udin ad el. Nus essan sia proprietad. El sulet sa dar e dat a nus ventira e veta cumpleina.

Sogn Augustin explichescha quei aschia: «Viers Tei, o Segner essan nus scaff, e malruasseivels ei nies cor, tochen ch'el ruaussa en Tei». Quei vala per mintga carstgaun, era sch'el ei buca sapientivs da quei.

EVANGELI

Mt 10,37–42

³⁷Tgi che tegn bab ni mumma pli car che mei, ei buca vengonzs da mei. E tgi che tegn feagl ni feglia pli car che mei, ei buca vengonzs da mei. ³⁸Tgi che pren buca sia crusch e suonda mei, ei buca vengonzs da mei. ³⁹Tgi che vul anflar sia veta, vegn a piarder quella, e tgi che piarda sia veta per amur da mei, vegn ad anflar ella.

⁴⁰Tgi che retscheiva vus, retscheiva mei, e tgi che retscheiva mei, retscheiva quel che ha tarmess mei.

⁴¹Tgi che retscheiva in profet, perquei ch'el ei in profet, vegn a survegnir la pagaglia che tucca al profet; tgi che retscheiva in gest, perquei ch'el ei in gest, vegn a survegnir la pagaglia che tucca al gest. ⁴²E tgi che dat da beiber ad in da quels pigns era mo in cup aua frestga, perquei ch'el ei in giuvnal, pilver, jeu ditgel a vus: El vegn buc a piarder sia pagaglia.